

Hier snackt Käpt'n Cordts:

Wremens Küster schull doot schoten warn

Goden Dag, leve Frünnen,

de Welt hett grode Schree no vör moockt so in de vergohn 70 bit 80 Johren. In unse Tied sünd sik dorbi mennigmol ganz fromme Minschen veel nöger komen. Seker hett dor de modern' Technik düchtig hulpen. Fröher, so vor 80 orer 90 Johren, wörr de Diek unse Welt. Wokeen mol no Bremerhoben komen dä, de vertell lang von de Stadt, de so ganz anners wörr as unse Umto. Dat wörr schon en groot Beleven (Erlebnis). Reisen no wiet weg, dor dach nüms nich an.

De Wremer Johann Friedrich Wollweber, he stunn so um 1900 tomidden in 't Leven, wörr Arbeitsmann, Köster (Küster) un Reithdachdecker. Unse Pastor Rehm hett em mol frogt wat dennso sien grööst' Beleven (Erlebnis) ween wöör.

He hett nich langen överleggt. „Herr Paster“, sä he, „dat is gor nich so langen her. 1914 an enen schönen Sommerdag. To, as de Krieg 1914/18 in de Gangen kommen dä. Szüh, dor is doch so een frechen Preuß (wörr een Infanterie-Major) bi se man so einfach in de Sloopstuuw rinkomen un hett den Karken-Slötel ganz gau hem wullt. Denn de halve Toorn, as se woll weet, muß dol. Wi harrn Krieg mit de Englänner, un de schullen denn schönen groten Toorn nich at Teken for sick klormoken. Un den tweten Slötel wullen se ok hem, szüh, un denn harr ik.

Un nu kummt! Ohn' antokloppen keem he mit twee Suldoten to de Döör rin. Mien Tochter Lene harr bald de Schöttel mit Speck fallen loten as he forts brüll, so as op 'n Kasernenhoff: „Sofort den zweiten Kirchenschlüssel her! Der Kirchturm muß runter!“

Ik wörr ganz langen still un sä dor kann jo jeder komen. Ik mutt unsen Pastor erst mol fragen. Dor brüll de Keerl: ‚Wir befinden uns im Kriegerrecht. Und wenn sie nicht sofort gehorchen werden sie unter Umständen als Verräter erschossen, haben sie mich verstanden, sie Keerl sie! ‘. Dor sä miene Tochter Lene: „Geev em gau den Slötel. Un op hochdütsch to den Preuß: ‚Erschießen um so einen alten Schlüssel - das können sie doch nicht machen, denn wir brauchen unseren Vater noch. Einer muß doch das Geld verdienen! ‘

Szüh, dennso bin ik mit den Preuß' noch se gohn, Herr Pastor, un dennso wörr dat allens klor. De Geschichte war ik nich vergeten. Un mit de Preußen harr ik as ole Hannoveroner jo ni wat in 'n Sinn, Herr Paster, denn se weet jo 1866 hebbt se unse Hannover-Land man eenfach so överfullen.“

Ik grööt jo düchtig un blieb jümmer joe ole Fründ

Käpt'n Cordts